

Član 207.
(Studentski pravobranilac)

- (1) Univerzitet ima studentskoga pravobranioca kojega imenuju predstavnici Studentskog parlamenta Univerziteta na vrijeme od jedne (1) godine.
- (2) Studentski pravobranilac Univerziteta može imati jednog ili više zamjenika na vrijeme od jedne (1) godine.
- (3) Mandat studentskoga pravobranioca Univerziteta i njegovih zamjenika može se jednom ponoviti.
- (4) Za studentskoga pravobranioca Univerziteta ili zamjenika istog može biti imenovan student koji ispunjava uvjete za člana Studentskog parlamenta Univerziteta.
- (5) Studentski pravobranilac Univerziteta odnosno njegovi zamjenici svoju funkciju vrše na Univerzitetu i fakultetu koji se nalaze u sastavu Univerziteta.
- (6) Na fakultetima koji se nalaze izvan sjedišta Univerziteta, Studentski parlament Univerziteta imenuje zamjenika studentskog pravobranioca Univerziteta iz reda predstavnika fakulteta na kojem postoji potreba za istim.

Član 208.
(Ovlaštenja studentskog pravobranioca i njegovih zamjenika)

Studentski pravobranilac Univerziteta odnosno njegov zamjenik ima slijedeća ovlaštenja:

- a) prima pritužbe studenata koje se odnose na njihova prava te raspravlja o tome sa tijelima Univerziteta odnosno fakulteta;
- b) savjetuje studente o načinu ostvarivanja njihovih prava;
- c) učestvuje u disciplinskim postupcima protiv studenata radi zaštite njihovih prava;
- d) obavlja i ostale poslove utvrđene ovim Statutom.

Član 209.
(Odgovornost studenta za štetu)

- (1) Student odgovara za štetu koju namjerno ili iz krajnje nepažnje prouzrokuje Univerzitetu.
- (2) Svaki student obavezan je da, usmeno u zapisnik ili pisanim putem, prijavi prouzrokovanu štetu dekanu fakulteta.
- (3) Na osnovu podnesene prijave ili na osnovu ličnog saznanja, dekan fakulteta rješenjem pokreće postupak za utvrđivanje štete i odgovornosti za prouzrokovanu štetu.
- (4) Rješenje o pokretanju postupka za utvrđivanje štete sadrži podatke o šteti, o studentu koji je štetu prouzrokovao i dokaze kojima se utvrđuje postojanje štete.

Član 210.
(Odluka o naknadi štete)

- (1) Odluku o visini štete, odgovornosti za štetu, mjeru povrede obaveza i obavezu studenta da nastalu štetu nadoknadi, donosi dekan fakulteta.
- (2) Ako student ne naknadi ili ne pristane da naknadi štetu Univerzitetu, podnijet će se tužba nadležnom sudu radi naknade štete.

Član 211.

(Postupak za utvrđivanje postojanja povreda obaveza studenta)

- (1) Postupak za utvrđivanje postojanja povreda obaveza studenta pokreće se rješenjem kojeg donosi dekan fakulteta, a na osnovu ličnog saznanja ili podnesene usmene ili pisane prijave.
- (2) Postupak iz prethodnog stava ne može se pokrenuti nakon isteka šest (6) mjeseci od dana saznanja za povredu obaveze studenta, a najkasnije 12 (dvanaest) mjeseci od dana kada je povreda učinjena.
- (3) Utvrđivanje postojanja povrede obaveze studenta u pokrenutom postupku i izricanje mjera vrši disciplinska komisija za izricanje mjera zbog povrede obaveza studenta (u daljem tekstu: disciplinska komisija).
- (4) Disciplinska komisija se sastoji od predsjednika, koji se bira iz reda nastavnika, odnosno saradnika, rukovodioca studentske službe, studentskog pravobranioca Univerziteta odnosno njegovih zamjenika i sekretara fakulteta na kojem je povreda učinjena.
- (5) Predsjednika i ostale članove disciplinske komisije imenuje dekan fakulteta.
- (6) Sekretar fakulteta odgovoran je za pravilnost rada komisije.
- (7) U radu disciplinske komisije umjesto studentskog pravobranioca Univerziteta može učestvovati njegov zamjenik koji je prethodno imenovan, ali samo u slučaju da se disciplinski postupak sprovodi izvan sjedišta Univerziteta ili ukoliko opravdano izostane studentski pravobranilac Univerziteta.

Član 212.

(Disciplinska komisija)

- (1) Disciplinska komisija, na osnovu usmene rasprave, u prvom stepenu, izriče mjeru zbog povrede obaveze studenta.
- (2) Disciplinska komisija može izreći mjeru samo u slučajevima da je počinitelj saslušan na raspravi, da je isti dostavio pisano izjašnjenje o događaju za koji se tereti, te ukoliko je na raspravu uredno pozvan, ali se pozivu bez opravdanih razloga, nije odazvao. Poziv se uručuje lično uz potpis počinioca na poziv čiji se drugi primjerak zadržava ili postavljanjem poziva na oglasnu ploču.

Član 213.

(Žalba na odluku disciplinske komisije)

- (1) Protiv odluke disciplinske komisije iz prethodnog člana, može se uložiti žalba, u roku od 8 (osam) dana od dana njenog prijema.
- (2) Žalba se podnosi Naučno-nastavnom vijeću, koji svojom odlukom izrečenu mjeru može ukinuti, preinačiti ili potvrditi, a koja je konačna.
- (3) O izrečenim mjerama vodi se odgovarajuća evidencija.
- (4) Disciplinska i materijalna odgovornost studenta bliže se uređuje Pravilnikom o disciplinskoj i materijalnoj odgovornosti studenta.

Član 214.

(Pravo na sudsku zaštitu)

Student ima pravo da pokrene upravni spor pred nadležnim sudom radi osporavanja svih konačnih odluka Univerziteta koje se odnose na disciplinsku odgovornost studenta.

POGLAVLJE VIII. PRAVA I OBAVEZE STUDENTA

Član 215. (Prava studenata)

(1) Studenti imaju sljedeća prava:

- a) prisustvovati svim predavanjima, seminarima i ostalim oblicima nastave organiziranim u okviru njihovih predmeta, u skladu s njihovim statusom i nastavnim planom i programom, te zavisno od mogućnosti, i ostalim oblicima organizirane nastave;
- b) pravo na konsultacije i mentorski rad;
- c) pravo na izjašnjavanje o kvalitetu nastave, nastavnika i saradnika;
- d) pravo da budu upoznati sa svojim pravima, obavezama i dužnostima na početku akademske godine;
- e) pravo da nastava bude organizovana u skladu sa studijskim programima, nastavnim planovima programima, rasporedom nastave i rasporedom ispita;
- f) pravo da završe studij u propisanom roku, uz redovno izvršavanje svojih obaveza;
- g) pravo na pritužbe u slučaju povrede studentskih prava utvrđenih zakonom, Statutom ili drugim općim i pojedinačnim aktima Univerziteta;
- h) pravo na korištenje biblioteke, računarske opreme i ostalih usluga za studente koje nudi Univerzitet odnosno fakultet;
- i) pravo na učešće na izborima za predstavnička mjesta Studentskog parlamenta Univerziteta odnosno fakulteta;
- j) pravo na pravovremeno i tačno obavješćavanje o svim pitanjima koja se odnose na studije;
- k) pravo na samoorganiziranje i izražavanje vlastitoga mišljenja;
- l) pravo na ravnopravnost u pogledu uvjeta studija i tretmana kao i na povlastice koje nosi studentski status;
- m) pravo na različitost i zaštitu od diskriminacije;
- n) pravo na priznavanje i prijenos bodova između visokoškolskih ustanova u Bosni i Hercegovini;
- o) ostala prava utvrđena ovim Statutom i drugim općim i pojedinačnim aktima Univerziteta.

(1) Za ostvarivanje prava studenata iz stava 1. ovoga člana, odgovorni su prorektor za nastavu i studentska pitanja i dekani fakulteta.

Član 216. (Obaveze studenata)

Studenti imaju sljedeće obaveze:

- a) na vrijeme plaćati školarinu;
- b) čuvati imovinu Univerziteta sa pažnjom dobrog domaćina;
- c) ispunjavati nastavne i ostale obaveze studenta;
- d) iskazivati dužno poštovanje prema pravima osoblja i drugih studenata u visokoškolskoj ustanovi;
- e) pokazivati dužnu i punu pažnju svome studiju i učestvovati u akademskim aktivnostima
- f) pridržavati se pravila koja su propisana općim i pojedinačnim aktima Univerziteta

i pozitivnim propisima.

Član 217.
(Pravo na završetak studija)

- (1) Student ima pravo započeti studij završiti po studijskom programu, nastavnom planu i nastavnom programu, koji su bili u primjeni prilikom upisa u I (prvu) godinu studija, a najkasnije do početka akademske godine u kojoj ga sustiže generacija studenata, upisana po izmijenjenom studijskom programu i nastavnom planu i programu.
- (2) Student koji ne završi započeti studij u roku utvrđenom u prethodnom stavu, završit će studij po izmijenjenom studijskom programu i nastavnom planu i programu.

Član 218.
(Student-demonstrator)

- (1) Redovni studenti, koji su u prethodnim godinama studija ostvarili najmanju prosječnu ocjenu 7 (sedam), a koji iz određenog nastavnog predmeta imaju najmanje ocjenu 8 (osam), mogu biti izabrani za studente-saradnike (*demonstratore*) na tom nastavnom predmetu, te, na osnovu takvog angažovanja, dobijati odgovarajuću novčanu naknadu, u skladu sa odlukom Upravnog odbora.
- (2) Student-saradnik (demonstrator) ne može biti uključen u obavljanje procesa provjere znanja i ispita, te ne može izvoditi predavanja i vježbe.
- (3) Izbor studenata-saradnika (*demonstratora*) vrši NNV fakulteta na prijedlog predmetnog nastavnika ili dekana, pri čemu prednost imaju studenti s većim ocjenama na konkretnom nastavnom predmetu.

Član 219.
(Upoznavanje studenata s njihovim pravima i obavezama)

- (1) Upoznavanje studenata s njihovim pravima i obavezama vrši se putem oglasnih ploča, web stranica, publikacija i drugih štampanih informacija Univerziteta odnosno fakulteta.
- (2) Na način iz stava 1. ovog člana studenti se obavještavaju naročito:
 - a) rasporedu nastave sa datumom, satnicom i mjestom održavanja svih predmeta;
 - b) o ispitnim terminima, za svaki ispitni rok, s datumom, satnicom i mjestom održavanja ispita svih predmeta;
 - c) o rezultatima postignutim na ispitima, najkasnije 7 (sedam) dana prije usmenog ispita ukoliko je isti predviđen odnosno narednog ispitnog roka iz istog predmeta, uz bezuslovnu mogućnost studenta da izvrši uvid u svoje pisane radove;
- (3) Uz obavještenja iz stava 2. ovog člana studenti će također biti obaviješteni na koji status studenta se ista odnose.
- (4) O ostvarivanju prava studenata iz prethodnog stava, brinu se prorektor za nastavu i studentska pitanja i dekani fakulteta.

Član 220.
(Postupanje po odredbama Zakona o upravnom postupku)

Kod rješavanja pitanja o pojedinačnim pravima i obavezama studenta, postupi se prema odredbama Zakona o upravnom postupku F BiH (u daljem tekstu: ZUP F BiH), kada se radi o:

- a) upisu kandidata u I (prvu) godinu studija;

- b) upisu studenata u narednu godinu studija;
- c) pravu studenata na izdavanje diplome;
- d) mjeri isključenja;
- e) obavezi plaćanja troškova studija; i
- f) drugim slučajevima utvrđenim Zakonom.

POGLAVLJE IX. STUDENTSKO PREDSTAVNIČKO TIJELO

Član 221.

(Studentski parlament Univerziteta)

- (1) Studentski parlament Univerziteta je studentsko predstavničko tijelo koje zastupa interese studenata Univerziteta i djeluje u sjedištu Univerziteta.
- (2) Studentski parlament Univerziteta imenuje svoje predstavnike radi učešća u Senatu Univerziteta te imenuje studentskog pravobranioca Univerziteta i njegove zamjenike.

Član 222.

(Studentski parlament fakulteta)

- (1) Studentski parlament fakulteta je studentsko predstavničko tijelo koje zastupa interese studenata, koje djeluje na fakultetima Univerziteta.
- (2) Studentski parlament fakulteta imenuje svoje predstavnike radi učešća u NNV fakulteta, Studentskom parlamentu Univerziteta kao i zamjenika studentskog pravobranioca Univerziteta na fakultetima izvan sjedišta Univerziteta.

Član 223.

(Članovi Studentskog parlamenta fakulteta)

- (1) Članovi Studentskog parlamenta fakulteta mogu biti svi studenti koji su upisani na I, II i III ciklus studija koje organizuje fakultet bez obzira na status, a čije učešće je dobrovoljno.
- (2) Radi učešća u Studentskom parlamentu fakulteta studenti se dobrovoljno prijavljuju sa svojim ličnim podacima i brojem upisnice sekretaru fakulteta koji sačinjava spisak te isti objavljuje najkasnije do 15. oktobra na oglasnoj ploči fakulteta.
- (3) Studenti koji su na spisku čine Studentski parlament fakulteta za tekuću akademsku godinu i isti stiču pravo da do 31. oktobra imenuju svoja 3 predstavnika i njihove zamjenike, a koji su po mogućnosti raspoređeni po ciklusima studija koji se organizuju na fakultetu.
- (4) Članstvo u Studentskom parlamentu fakulteta se obnavlja svake godine.

Član 224.

(Izbor predstavnika Studentskog parlamenta fakulteta i njihovih zamjenika)

- (1) Predstavnici Studentskog parlamenta fakulteta i njihovi zamjenici su izabrani ukoliko su dobili većinu glasova od strane prisutnih članova Studentskog parlamenta fakulteta i to na način da se tri studenta sa najvećim brojem glasova imenuju kao predstavnici Studentskog parlamenta fakulteta, a ostala tri studenta koji su zauzeli četvrto, peto i šesto mjesto po broju glasova imenuju se kao zamjenici predstavnika Studentskog

parlamenta fakulteta s tim da prioritet u zamjeni ima student sa većim brojem glasova od ostalih.

- (2) Izabrani predstavnici Studentskog parlamenta fakulteta odnosno zamjenici istih stižu pravo na učestvovanje u NNV fakulteta i čine dio Studentskog parlamenta Univerziteta.

Član 225.

(Članovi Studentskog parlamenta Univerziteta)

- (1) Članovi Studentskog parlamenta Univerziteta su svi izabrani predstavnici Studentskog parlamenta fakulteta u skladu sa članom 224. ovog Statuta.
- (2) Radi sastavljanja liste učesnika u Studentskom parlamentu Univerziteta Studentski parlament svih fakulteta dostavlja spisak izabranih predstavnika odnosno njihovih zamjenika u slučaju njihove spriječenosti generalnom sekretaru Univerziteta sa tačnim brojem dobijenih glasova.
- (3) Studentskim parlamentom Univerziteta predsjedava predsjednik parlamenta.
- (4) Bliže odredbe o načinu rada i organizaciji Studentskog parlamenta Univerziteta i fakulteta uređuju se Poslovníkom koji donosi Studentski parlament Univerziteta.

Član 226.

(Izbor predstavnika Studentskog parlamenta Univerziteta i njihovih zamjenika)

- (1) Predstavnici Studentskog parlamenta Univerziteta su izabrani ukoliko su dobili većinu glasova od strane prisutnih članova Studentskog parlamenta Univerziteta i to na način da se tri studenta sa najvećim brojem glasova imenuju kao predstavnici Studentskog parlamenta Univerziteta. Predstavnik koji je osvojio najveći broj glasova se istovremeno imenuje za predsjednika Studentskog parlamenta Univerziteta.
- (2) Izabrani predstavnici Studentskog parlamenta Univerziteta stižu pravo na učestvovanje u Senatu Univerziteta.

Član 227.

(Izbor studentskog pravobranioca Univerziteta i njegovih zamjenika)

- (1) Studentski pravobranioac u sjedištu Univerziteta je izabran ukoliko je dobio većinu glasova od strane prisutnih članova Studentskog parlamenta Univerziteta.
- (2) Zamjenici studentskog pravobranioca na organizacionim jedinicama izvan sjedišta Univerziteta se biraju u skladu sa stavom 1. ovog člana s tim da je za zamjenika studentskog pravobranioca na organizacionim jedinicama izvan sjedišta Univerziteta izabran student sa većinom glasova u odnosu na predstavnike iste organizacione jedinice.

Član 228.

(Učešće zamjenika studentskog predstavnika u tijelima Univerziteta)

- (1) Studentski pravobranioac Univerziteta može učestvovati kao zamjenik studentskih predstavnika u tijelima Univerziteta isključivo uslijed opravdane spriječenosti izabranih predstavnika, a što obavezno dokumentuju prije učešća u tijelima Univerziteta potpisanom pisanom izjavom zamijenjenog predstavnika.

- (2) Izuzetno suprotno stavu 1. ovog člana Studentski pravobranioc Univerziteta ne mora imati potpisanu pisanu izjavu zamijenjenog predstavnika ukoliko se na osnovu njegovog ponašanja može zaključiti da ne želi više obnašati funkciju predstavnika studenta i ne prisustvuje više od dva puta na sjednicama tijela Univerziteta.

Član 229.

(Prava i obaveze Studentskog parlamenta Univerziteta)

- (1) Prava Studentskog parlamenta Univerziteta su slijedeća:
- a) da održava redovno sjednice;
 - b) da radi potreba održavanja sjednica koristi prostorije Univerziteta;
 - c) da na svojim sjednicama usvaja zaključke vezane za prava studenata na Univerzitetu većinom glasova i da o tome raspravlja na Senatu Univerziteta;
 - d) da predlaže izmjenu svojih predstavnika odnosno zamjenika studenata;
 - e) da donese pravilnik o svom radu ukoliko za istim postoji potreba.
- (2) Obaveze Studentskog parlamenta Univerziteta su slijedeće:
- a) da imenuje svoje predstavnike i njihove zamjenike radi učešća u Senatu Univerziteta;
 - b) da imenuje studentskog pravobranioca Univerziteta i njegove zamjenike;
 - c) da njegovi predstavnici redovno učestvuju u radu Senata Univerziteta.

Član 230.

(Prava i obaveze Studentskog parlamenta fakulteta)

- (1) Prava Studentskog parlamenta fakulteta su slijedeća:
- a) da održava redovno sjednice;
 - b) da radi potreba održavanja sjednica koristi prostorije fakulteta;
 - c) da na svojim sjednicama usvaja zaključke vezane za prava studenata na fakultetu većinom glasova i da o tome raspravlja na NNV-u Univerziteta;
 - d) da predlaže izmjenu svojih predstavnika odnosno zamjenika studenata;
 - e) da donese pravilnik o svom radu ukoliko za istim postoji potreba.
- (2) Obaveze Studentskog parlamenta fakulteta su slijedeće:
- a) da imenuje svoje predstavnike i njihove zamjenike radi učešća u NNV-u fakulteta;
 - b) da njegovi predstavnici redovno učestvuju u radu NNV-a fakulteta.

Član 231.

(Zagarantovana prava, nedozvoljene radnje i gubitak statusa predstavnika Studentskog parlamenta Univerziteta odnosno fakulteta)

- (1) Članovima Studentskog parlamenta Univerziteta odnosno fakulteta zagarantovana je sloboda mišljenja i izražavanja u okviru istih.
- (2) U okviru Studentskog parlamenta Univerziteta odnosno fakulteta nije dozvoljeno političko, vjersko i stranačko organizovanje i djelovanje u okviru rada, sjednica, projekata i sl.
- (3) Status predstavnika Studentskog parlamenta Univerziteta odnosno fakulteta prestaje:
- a) istekom mandata
 - b) prestankom statusa studenta
 - c) prijevremenim razrješenjem
 - d) ostavkom

Član 232.

(Mandat predstavnika Studentskog parlamenta Univerziteta i fakulteta)

Predstavnici Studentskog parlamenta Univerziteta odnosno fakulteta se biraju na period od 1 (jedne) godine sa mogućnošću ponovnog izbora ukoliko se zadrži status studenta.

Član 233.

(Prostor za rad i administrativno-tehnička pomoć)

- (1) Univerzitet će omogućiti Studentskom parlamentu Univerziteta odnosno fakulteta za potrebe njegovog rada prostorije i administrativno-tehničku pomoć na način da se ne remeti organizacija i sprovođenje nastave i ispita.
- (2) Radi ostvarivanja prava iz stava 1. ovog člana predstavnici Studentskog parlamenta Univerziteta se obraćaju generalnom sekretaru sa zahtjevom, pismenim putem u svrhu dodjeljivanja prostorija za rad i pružanja administrativno-tehničke pomoći u sjedištu Univerziteta.
- (3) Analogno prethodnom stavu predstavnici Studentskog parlamenta fakulteta se obraćaju sekretaru fakulteta sa zahtjevom, pismenim putem u svrhu dodjeljivanja prostorija za rad i pružanja administrativno-tehničke pomoći na fakultetu izvan sjedišta Univerziteta.
- (4) Univerzitet/fakultet dodjeljuje sredstva za rad Studentskom parlamentu Univerziteta/fakulteta koja se vode na računu Univerziteta odnosno fakulteta. Studentski parlament Univerziteta/fakulteta autonomno raspolaže dodijeljenim sredstvima u skladu sa Poslovníkom Studentskog parlamenta.

Član 234.

(Ostale studentske organizacije)

- (1) Studenti se imaju pravo udruživati u studentske organizacije na organizacionim jedinicama u kojima članstvo mogu ostvariti svi studenti organizacione jedinice Univerziteta.
- (2) Studentske organizacije bave se ostvarivanjem i zaštitom prava i interesa studenata u naučno-nastavnom/umjetničko-nastavnom, naučnoistraživačkom, stručnom, kulturnom, sportskom i drugom radu, kao i unapređenjem životnog standarda i društvenog života studenata.
- (3) Bliže odredbe o sastavu, broju i nadležnostima organa organizacija studenata po organizacionim jedinicama sadržane su u Statutima istih.
- (4) Sekretarijat Univerziteta vodi evidenciju studentskih organizacija koje djeluju na Univerzitetu.